

TAHUN KE 2

RABIULAWAL 1407/NOVEMBER 1986



KELUARAN  
ANGKATAN  
NAHDHATUL  
ISLAM  
BERSATU  
(BINA)




**AL-HUDA**

NOMBOR

**15**

SIRI PENGAJIAN DAN MEDIA SILATURRAHIM

**Ibu Pejabat  
Angkatan Nahdhatul Islam  
Bersatu (BINA)**



قُلْ إِنَّ مَدِيَّ اللّٰهُ هُوَ الْمُهْدِيّ .

(البقرة: ١٢٠)

Katakanlah: "Sesungguhnya pertunjuk Allah itulah pertunjuk yang sebenarnya." (Al-Baqarah 120)

---

---

**TERHAD  
UNTUK PARA AHLI SAHAJA**

---

---

Ibu Pejabat,  
Jalan Datuk Patinggi  
Haji Abdul Rahman Yakub,  
Petra Jaya, 93050 Kuching,  
Sarawak, Malaysia.

Telifon: 082-443993,  
082-443994 ext. 11 atau 31

# AL-HUDA

TAHUN 2 NO. 15, Rabiulawal 1407/NOVEMBER 1986

## PENGURUSAN

Penasihat:

USTAZ HAJI FATHI HAJI DUET

Pengarah:

TUAN HAJI MOKHSEN IBRAHIM

Timbalan Pengarah/Ketua Unit Penerbitan:

HASAN.HAJI HAMZAH

Pengedaran:

USMAN HJ. AFANDI

Rekabentuk:

BUJANG JENAI

Perekaletak

S.M. DOLLAH

## ANGGOTA PENGARANG

Ketua Pengarang:

USTAZ HAJI MORTADZA HAJI DAUD

Penolong Ketua Pengarang:

USTAZ HAJI HASSANOEDDIN ABU

BAKAR

Sidang Pengarang:

— USTAZ HAJI BAHARUDDIN MANSUR

— USTAZ SYED MUHAMAD.ALWI

AL-ATTAS

— DR. WAN ALI TUANKU MADHI

— USTAZAH ROHANI BINTI AWI

— USTAZ HAJI ALI FATHULLAH HARUN

## KANDUNGAN

Rencana Kulit, Ibu Pejabat BINA .....	3
Perasmian Bangunan Ibu Pejabat Baru	
BINA .....	5
BINA Dengan Wajah Baru .....	7
Senarai Nama Ahli Jawatankuasa Kerja Pusat BINA 1986-1988 .....	9
Usul-usul yang telah diterima dan diluluskan .....	12
Muhammad SAW, Pemimpin Yang Patut dicontoh oleh Para Pemimpin .....	13
Tiada Pemujaan berlebihan terhadap diri Nabi Muhammad SAW .....	15
Pentingnya Agama Islam diamalkan bagi menjamin keamanan dan kebahagiaan hidup .....	19
Sajak .....	29
Mimbar Hadis .....	31
Pejuang-pejuang Wanita Islam .....	35
Kisah terbunuhnya Keluarga Al-Faruqi .....	38
Pusat Islam Baru di Madrid .....	42
Mutiara Hikmat .....	44
Rangkuman Do'a .....	46

## PENGUMUMAN

Tuan-Tuan dan Puan-Puan,  
Muslimin dan Muslimat' sekalian;

Dimaklumkan dengan segala hormatnya bahawa pihak pengurusan penerbitan Risalah AL-HUDA mengalu-alukan sumbangan derma seikhlas hati bagi membiayai penerbitan seterusnya risalah ini.

Tiap-tiap derma akan dikeluarkan resit resmi yang boleh dikecualikan daripada cukai pendapatan.

Segala sumbangan boleh dialamatkan seperti berikut:-

Kepada:  
Pengarah,  
Penerbitan Al-Huda,  
Ibu Pejabat BINA,  
Jalan Tun Datuk Patinggi  
Haji Abdul Rahman Ya'kub,  
Petra Jaya,  
93050 Kuching, Sarawak.

Se kian dimaklumkan, terima kasih.  
Pengarah

---

## *RENCANA KULIT:*

# **IBU PEJABAT BINA**

---

---

### **PENGENALAN**

Bangunan Ibu Pejabat Angkatan Nahdhatul Islam Bersatu (BINA) adalah sebahagian dari Kompleks Pusat Islam yang dicadangkan di atas tanah seluas 100 ekar di Jalan Datuk Patinggi Haji Abdul Rahman Ya'kub. Lain-lain bangunan yang akan wujud di atas kawasan ini ialah Masjid Negeri Sarawak yang baru dan lain-lain bangunan untuk kemudahan pengajian dan kemasyarakatan umat Islam di negeri ini. Menurut persetujuan, selain dari Masjid Negeri, kemudahan-kemudahan lain hendaklah diwujudkan dan BINA telah bercadang untuk menyediakan kemudahan-kemudahan seperti kemudahan pengajian Islam, khutub-khanah, bilik-bilik kuliah, dewan-dewan sebaguna dan lain-lain kemudahan untuk Pusat Islam yang dicadangkan itu.

Walaupun projek Pusat Islam ini pada keseluruhannya agak tertangguh,

namun dengan izin Allah s.w.t. dan dengan kedudukan kewangan yang mengizinkan BINA telah dapat memulakan projek ini pada 5hb Ogos, 1982. Dengan persetujuan bahawa projek BINA ini adalah merupakan sumbangan BINA dalam mewujudkan Pusat Islam, maka pihak Lembaga Amanah Kebajikan Masjid Negeri Sarawak telah membenarkan BINA mendirikan bangunan ini atas tanah yang mana akan di sublease kepada BINA. Projek yang memakan belanja \$5.8 juta ringgit ini telah siap dalam bulan Disember, 1985.

### **KONSEP**

Rekaan bangunan ini berdasarkan kebudayaan Islam dan SeniBina Islam Modern. Orientasi keseluruhannya berasaskan penghadapan ke arah Kiblat. Unsur kebudayaan Islam jelas terpampang dari segi rekaan seperti gerbang-gerbang, pintu ukiran dan

hiasan-hiasan. Konsep 'Courtyard' merupakan rekaan yang berasaskan keselesaan penggunaan bangunan ini. Tanam-tanaman dan tempat bersejarah 'Boulevard' memaparkan kaedah kesuburan dan ketenteraman yang dihayati oleh seluruh umat Islam.

Kawasan sekeliling bangunan ini, reka bentuk dan warnanya adalah dioleh supaya ianya akan tetap setanding dan tidak mewujudkan percanggahan dengan bangunan-bangunan lain yang akan didirikan dikawasan kompleks ini pada masa yang akan datang.

Bangunan ini juga telah direka bersesuaian dengan alam sekitar yang mana Masjid Negeri akan didirikan berhampiran dengannya.

### **KANDUNGAN BANGUNAN**

Bangunan ini merupakan satu bangunan tiga tingkat yang bercantum dengan bangunan Dewan Serbaguna.

Seperti bangunan-bangunan yang lain bangunan ini juga direka dengan kemudahan-kemudahan seperti yang tercatat di bawah:-

#### **Tingkat Bawah**

- (i) Ruang Pejabat
- (ii) Bilik perpustakaan yang dapat menyimpan sebanyak 30,000 naskah buku berserta dengan bilik bacaan untuk 80 orang.
- (iii) Kantin
- (iv) Dewan serbaguna A & B
- (v) Seni Taman

#### **Tingkat Pertama**

- (i) Bilik Pejabat
- (ii) Sekolah Tadika

#### **Tingkat Kedua**

- (i) Bilik mesyuarat untuk 50 orang
- (ii) Bilik pejabat
- (iii) Taman Bumbong

Kemudahan asas seperti tempat letak kereta juga disediakan di kawasan bangunan ini.

### **PERBELANJAAN BAGI PROJEK IBU PEJABAT BINA**

1. Kerja Menimbok Tanah	\$ 87, 538.01
2. Infrasktruktur	271,117.30
3. Bangunan	3,600,000.00
4. Perhiasan Dalam	728,484.40
5. Pemasangan Letrik	426,448.40
6. Alat Berhawa Dingin	152,648.00
7. Kerja-kerja Tambahan	518,862.30
	<hr/>
	\$5,785,090.60

Harga diatas masih belum tetap disebabkan kerja-kerja tambahan masih dalam proses.

*Y.B. Menteri Pelajaran  
Malaysia, Encik Anwar  
Ibrahim, menarik tali  
pembuka tirai, diatas  
pentas dewan*

*Tampak dari kiri ke  
kanan:  
Shahibussamahan  
Mafti Negeri Sarawak,  
Datuk Haji Abdul  
Kadir Hassan, Sheikh  
Nazim Adil Al-  
Qubrusi, Y.B. Menteri  
Pelajaran Encik Anwar  
Ibrahim, Yang Amat  
Berbahagia Tun Abdul  
Rahman Ya'kub dan  
Pengerusi Jawatan  
Kuasa Perasman Al-  
Ustaz Hj. Mohd.  
Mortadza Hj. Dawud.*




## BERITA BERGAMBAR

# PERESMIAN BANGUNAN BARU IBU PEJABAT "BINA" DAN PERHIMPUNAN PERWAKILAN KE - 8

PADA 9 MUHARRAM,  
1407H./13 SEPTEMBER, 1986





*Hadirin dan hadirat  
 yang memenuhi Dewan  
 serba guna itu tampak  
 sedang menadahkan  
 tangan mengikuti do'a  
 kesyukuran yang  
 dibacakan oleh  
 Shahibul Fadhilah  
 Imam Besar Negeri  
 Sarawak, Kiyai Hj  
 Fathullah Harun.*



*Tirai terbuka,  
 Lambang Perasmian di  
 sambut dengan wajah  
 berseri.*

---

## *Rencana Pengarang*

# **BINA DENGAN WAJAH BARU**

Awwal Muharram, 1407H, bukan secara kebetulan, bahkan sebenar-benar telah menghembuskan angin segar kepada Pertubuhan BINA (Angkatan Nahdhatul Islam Bersatu), hingga ianya menampakkan wajah baru yang berseri-seri.

1. Pada tanggal 9 Muharram, 1407 telah diresmikan bangunan baru Ibu Pejabatnya oleh Menteri Pelajaran Malaysia, Encik Anwar Ibrahim bagi pihak Timbalan Perdana Menteri yang berhalangan datang. Satu bangunan yang megah tersergam dikawasan Petra Jaya Kuching. (Lihat gambar kulit muka dan artikel "Ibu Pejabat BINA"). Kurang lebih 1500 orang telah membanjiri Dewan Serbaguna daripada bangunan tersebut pada ketika peresmian itu diadakan. Tidak kurang diantaranya hadir tamu-tamu dari luar negeri dan wakil dari Agama lain.
2. Pada keesokan harinya, Ahad, 10 Muharram, 1407, telah berlangsung Sidang Perhimpunan Perwakilan

BINA yang kelapan, bertempat di Dewan Musyawarat Agung. Musyawarat berjalan lancar, rancak dan meriah. Kritik, usul dan cadangann dilontarkan, dibahas dan diputuskan dengan cukup demokratis.



Diantaranya yang penting ialah, bahawa BINA hendaklah menunjukkan wajahnya yang sebenarnya sebagai satu Gerakan Dakwah Islamiah, berjuang menegakkan Islam diatas dasar yang murni berlandaskan Al-Quran dan Sunnah yang sah.

(Untuk selanjutnya lihat artikel "Usul-usul yang telah diterima dan diluluskan").

Demikian pula pemilihan ahli-ahli Jawatankuasa Tertinggi yang baru, berjalan dengan lancarnya, dimana Tun Datuk Patinggi Haji Abdul Rahman Yakub telah dikekalkan sebagai Yang Di Pertua BINA, tanpa bertandaing.

3. Harapan Kita:  
BINA dengan wajah barunya, semoga

akan bergerak cergas melayarkan bahtera perjuangannya.

Jawatankuasa Tertinggi yang baru, kiranya dapat melantik satu Jawatankuasa Kerja, yang dapat bergerak dengan lincah dan cergas dengan program kerja yang matang dan nyata, hinggalah harapan umat tidak akan terkecewa!

Luncurkan bahtera, harungi lautan,  
Menentang gelombang, badai dan topan,

Dengan sabar, tawakkal, teguh keimanan,

Berjuang gigih mencapai tujuan!

بِسْمِ اللّٰهِ مَجْرَاهَا وَمُرْسَاهَا  
اِنَّ رَبِّي لَغَفُورٌ رَّحِيْمٌ

(Dari dapur Al-Huda)  
(HASAB)





# SENARAI NAMA AHLI JAWATANKUASA KERJA PUSAT BINA 1986 - 1988

- 1) Y.A. Bhg. Tun Datuk Patinggi Haji Abdul Rahman Ya'kub — Yang Di Pertua BINA
- 2) Yang Berbahagia Datuk Amar Abang Hj Yusuf Puteh — Timb. Yang Di Pertua I
- 3) Sahibussamahah Datuk Haji Abdul Kadir Hassan — Timb. Yang Di Pertua II
- 4) Ustaz Haji Mohd. Mortadza Haji Daud — Timb. Yang Di Pertua III

## MAJLIS PERHIMPUNAN PERWAKILAN BINA

- |  |                                      |
|--|--------------------------------------|
| 5) Dr Haji Wan Ali Tuanku Haji Madhi             | — Naib Yang Di Pertua Bhgn. Pertama  |
| 6) Tuan Haji Wan Abdul Hamid Edruce Wan Mohammad | — Naib Yang Di Pertua Bhgn. Ke Tiga  |
| 7) Tuan Haji Imran Abdul Hamid                   | — Naib Yang Di Pertua Bhgn. Ke Empat |
| 8) Tuan Haji Idris Abdullah                      | — Naib Yang Di Pertua Bhgn. Ke Tujuh |
| 9) Ustaz Haji Fathi Hj Duet                      | — Setiausaha Agung                   |
| 10) Haji Mohd. Louis Ali                         | — Pen. Setiausaha Agung              |
| 11) Haji Mokhsen Ibrahim                         | — Bendahari Kehormat                 |
| 12) Haji Saad Hassan                             | — Pen. Bendahari                     |
| 13) Abang Haji Mohd Atei Medaan                  | — Pegawai Perhubungan                |
| 14) YB Datuk Hajjah Hafsa Haji Harun             | — Ahli Jawatankuasa                  |
| 15) YB Datuk Haji Nor Tahir                      | — Ahli Jawatankuasa                  |
| 16) YB Datuk Amar Haji Bujang Nor                | — Ahli Jawatankuasa                  |
| 17) Datuk Haji Safri Awang Zaidell               | — Ahli Jawatankuasa                  |
| 18) Datuk Haji Borhan Sablo                      | — Ahli Jawatankuasa                  |
| 19) Tuan Haji Anis Haji Abot                     | — Ahli Jawatankuasa                  |
| 20) Hajjah Sharifah Mordiah Tuanku Hj Fauzi      | — Ahli Jawatankuasa                  |
| 21) Haji Mohd Deli Haji Abdul Rahman             | — Ahli Jawatankuasa                  |
| 22) Haji Ismail Haji Hassan                      | — Ahli Jawatankuasa                  |
| 23) Encik Hasbi Mohree                           | — Ahli Jawatankuasa                  |
| 24) Encik Salleh Sulaiman                        | — Ahli Jawatankuasa                  |
| 25) Encik Mustapha Besar                         | — Ahli Jawatankuasa                  |
| 26) Ustaz Haji Nahrawi Haji Abdul Rahman         | — Ahli Jawatankuasa                  |
| 27) Ustaz Che Min Che Mat                        | — Ahli Jawatankuasa                  |
| 28) Ustaz Baharuddin Mansur                      | — Ahli Jawatankuasa                  |
| 29) Cikgu Adi Badiozaman Tuah                    | — Ahli Jawatankuasa                  |
| 30) Encik Mohd. Jamil Mukmin                     | — Ahli Jawatankuasa                  |
| 31) Haji Hasbi Sulaiman                          | — Ahli Jawatankuasa                  |

## MAJLIS PERHIMPUNAN PERWAKILAN BINA

- |   |                     |
|---|---------------------|
| 32) Haji Annuar Haji Abdul Razak        | — Ahli Jawatankuasa |
| 33) Ustazah Sharifah Aini Syed Sharbini | — Ahli Jawatankuasa |
| 34) Hajjah Alauyah Haji Noor            | — Ahli Jawatankuasa |
| 35) Hajjah Salmah Said                  | — Ahli Jawatankuasa |
| 36) Encik Iskandar Razali               | — Ahli Jawatankuasa |
| 37) Dr Mohd Hirman Ritom                | — Ahli Jawatankuasa |
| 38) Encik Matnor Abang                  | — Ahli Jawatankuasa |
| 39) Ustaz Haji Mohd Fauzi Mohiddin      | — Ahli Jawatankuasa |
| 40) Haji Shafie Khan                    | — Ahli Jawatankuasa |
| 41) Haji Mortadha Lau Abdullah          | — Ahli Jawatankuasa |
| 42) Haji Ismail Talab                   | — Ahli Jawatankuasa |
| 43) Encik Idris Bohari                  | — Ahli Jawatankuasa |
- 
- 

**Wahai orang-orang yang beriman! janganlah kamu mengharamkan (perkara) yang baik-baik yang Allah telah menghalalkanNya bagi kamu dan janganlah kamu melanggar peraturan. Sesungguhnya Allah tidak suka kepada orang-orang yang melanggar peraturan. Dan makanlah oleh kamu daripada rezeki yang halal lagi baik yang Allah kurniakan kepada kamu dan takutlah kepada Allah yang kamu telah percaya kepadaNya .**

(al Maidah: 87-88)

**USUL-USUL DILUSUKAN  
DALAM SIDANG MAJLIS  
PERHIMPUNAN  
PERWAKILAN BINA  
PADA 10 MUHARRAM 1407/  
14 SEPTEMBER 1986**

1. Supaya BINA mengkaji dan meneliti semula semua kegiatan dan programnya supaya selaras dengan kehendak dan tuntutan agama Islam seperti yang terkandung dalam Al-Quran dan Al-Sunnah.
2. Supaya BINA mengkaji semula keutamaanya, supaya matlamat utama BINA sebagai sebuah gerakan dakwah Islamiah dapat dicapai.
3. Supaya aktiviti dan program kegiatan BINA Cawangan di seluruh negeri diselaraskan, agar matlamat utama BINA dapat dicapai, dan pada masa yang sama dapat menggambarkan kesatuan pergerakan di dalam BINA itu sendiri.
4. Supaya BINA kerap mengadakan muzakarah dengan badan-badan dakwah lain di negeri Sarawak ini dengan tujuan untuk mencari titik pertemuan, persetujuan dan persamaan di dalam usaha untuk mempergiatkan lagi gerakan dahwah Islamiah secara bekerjasama.
5. Supaya pemimpin-pemimpin Islam yang terlibat di dalam krisis politik Sarawak kembali kepada Al-Quran dan Al-Sunnah demi untuk menjamin masa depan masyarakat Islam.
6. Mengutuk sekeras-kerasnya serangan Amerika Syarikat ke atas Libya dan penjajahan Soviet Union di Afghanistan.
7. Supaya BINA meneliti dan mengkaji semula strategi dakwahnya dan tindakan susulan di kalangan saudara-saudara baru.
8. Mohon pihak MAS menambah lagi sebuah surau di lapangan terbang Kuching yang memberi kemudahan kepada orang yang datang, orang yang menghantar dan menunggu orang datang dapat menunaikan Salat, seperti yang terdapat di lapangan terbang Antarabangsa Subang, Kuala Lumpur. Surau yang ada di lapangan terbang sekarang hanya memberi kemudahan menunaikan salat kepada orang yang hendak pergi.

# MUHAMMAD S.A.W. PEMIMPIN YANG PATUT DICONTOHI OLEH PARA PEMIMPIN

---

OLEH ALFATH MARKAS BINA CAWANGAN KUCHING

---

Setelah pengikut-pengikut Nabi berjumlah 30 orang, Allah memerintahkanNya untuk melakukan da'wah secara terang-terangan dalam firmanNya:

فاصدع بما تؤمر واعرض  
• واعرض عن المشركين .

“Maka sampaikanlah secara terang-terangan apa-apa yang diperintahkan kepadamu dan berpalinglah dari orang-orang musyrikin.”

Maka mulailah Nabi s.a.w. bersama sahabat-sahabatnya berda'wah secara terang-terangan, dan sejak saat itu pulalah kaum muslimin mula memasuki masa penuh rintangan, bahkan tekanan-tekanan. Untuk menjaga ketahanan jiwa dan iman, Rasulullah s.a.w. selalu mengadakan pertemuan rahsia dengan sahabat-sahabatnya bertempat di rumah Arqom

bin Abi Arqom, disanalah Nabi membacakan dan mengajarkan wahyu serta isinya sejauh yang telah diturunkan Allah, sehingga setiap rintangan yang mereka lalui merupakan tempahan untuk menguatkan keimanan yang sudah ada, tidak sedikit diantara sahabat-sahabat yang gugur dan cedera dalam mempertahankan keimanan mereka, inilah sikap tegas mereka dalam memikul tanggungjawab sesuai dengan tauladan yang dilakukan oleh pemimpin mereka Muhammad s.a.w. tatkala paman beliau meminta agar beliau mengurangi gerak kerja da'wah yang dijawab dengan:

والله لو وضعوا الشمس في يميني  
والقمر في يساري على ان أترك  
هذا الا مرحتى يظهره الله او  
أهلك دونه ما تركته .

“Demi Allah, sekalipun mereka letakkan matahari di (pundak) kananku dan bulan di (pundak) kiriku, agar aku tinggalkan kerja da’wah ini, niscaya aku tak akan meninggalkannya, hingga agama ini tegak atau aku mati kerananya.”

Kaum musyrikin Quraisy putus asa atas kegagalan usaha-usaha mereka dalam menyekat da’wah Islam, maka diutuslah seseorang menghadap Rasul menawarkan kemewahan dengan katanya: “Hai Muhammad jika dengan ajaranmu engkau menginginkan harta, kami akan kumpulkan harta-harta kami untukmu sehingga engkau menjadi orang terbanyak hartanya, dan jika engkau inginkan wanita kami, pilihkan wanita tercantik, jika kehormatan yang engkau inginkan kami akan angkat engkau menjadi pemimpin kami dan jika kekuasaan yang engkau inginkan dengan ajaranmu itu, kami akan angkat engkau menjadi raja kami” akan tetapi taktik ini kandas dihadapan Nabi, sebab memang bukan untuk itu Muhammad s.a.w. dan umatnya melakukan da’wah. Siksaanpun dilakukan lagi dengan berlipat ganda, sehingga Nabi memerintahkan para sahabat untuk berhijrah ke Habasyah dengan harapan mereka dapat keluar dari keadaan yang menimpa mereka, maka berangkatlah 12 orang laki-laki dan 4 orang wanita berhijrah. Itu semua belum cukup lagi, mereka melakukan sekatan ekonomi, perdagangan, pergaulan dan pernikahan dengan para pengikut dan suku

kaum Nabi, Bani Hasyim dan Bani Mutolib untuk jangka waktu yang tidak ditentukan, Akibat tindakan itu Nabi, sahabat-sahabatnya dan keluarga besarnya mengalami kesulitan selama lebih dua tahun. Begitulah dari satu cobaan hingga ke cobaan yang lain, rintangan dan tekanan dihadapi oleh Nabi s.a.w. dan para sahabat, semuanya tidak melemahkan semangat juang untuk terus menegakkan kebenaran, menegakkan “LAA ILAAHA ILLA-LLAH MUHAMMADUR RASUULULLAH” tiada Tuhan yang wajib disembah melainkan Allah dan Muhammad adalah utusan Allah, menegakkan kemerdekaan yang hakiki; membebaskan manusia dari penyembahan manusia kepada penyembahan Tuhan manusia, dari kesempitan dunia kepada keluasan dunia dan akhirat, dari kezaliman sistem hidup ciptaan manusia kepada keadilan Islam. Itulah slogan yang betul betul nyata dilaksanakan oleh pemimpin umat Muhammad s.a.w., ia bukan sekedar slogan kosong yang selalu dilaungkan oleh kebanyakan pemimpin-pemimpin masa kini, oleh itu ramai pemimpin-pemimpin bangsanya berlomba-lomba untuk menerima ajaran dan agama baginda s.a.w.: Abu Bakar, Thalhaf, Zubair, Utsman bin Affan, Abdur-Rahman bin Auf, Sa’ad bin Abi Waqos dll. yang dengan beriman kepada ajaran Nabi itu berarti mereka rela melepaskan kemulyaan dan kemegahan yang melingkungi mereka selama ini, dan pada waktu yang bersamaan sedia menghadapi kehidupan

yang bergejolak, penuh dengan cabaran, perjuangan dan beban penderitaan. Ramai rakyat jelata diantara kaumnya berlindung diri kepadanya dan segera bernaung di bawah panji-panji dan bendera da'wahnya, padahal mereka mengetahui bahwa baginda tidak mempunyai harta maupun senjata dan tidak luput dari bahaya, bahkan selalu dikejar-kejar bencana yang mengancamnya secara kejam tanpa ada pembela yang akan melindunginya.

Itulah Muhammad s.a.w. yang memiliki keutamaan dan keistimewaan, kesucian, kesederhanaan, keberanian dan pendirian yang teguh, yang nampak oleh mereka ketinggian dan rasa santunnya, akal budi dan buah pikirannya.

Itulah pemimpin ideal yang menjadi tauladan umat, tak satupun yang tersembunyi mengenai perihidupnya; sejak kecil yang menjadi perhatian penduduk Makkah kerana kelainan-kelainannya dengan anak-anak sebayanya, hinggalah akhir hidupnya, semuanya merupakan kehidupan yang jelas dan gamblang, segala pandangan, langkah, ucapan, gerak-gerik, impian, cita-cita dan angan-angan hatinya, semua itu pantas dijadikan ikutan semua umat manusia.

Adakah lagi hal-hal meragukan,? terdapat kepalsuan?, pernahkan ia berdusta?, pernahkan ia berkhiamat?, adakah seseorang yang dianiayai?, atau adakah janji yang dilanggarnya?, adakah silaturrahi yang diputuskan-

nya?, tanggungjawab yang dilemparkan dari pundaknya atau perikemanusiaan yang diabaikannya?

Dalam masa ia dianiayai, tak pernah terkeluar diri bibirnya ucapan memaki, mencerca dan mengecam, Pernah ia dilempari batu oleh kanak-kanak yang diperintahkan oleh para orang tuannya sehingga ia menderita luka-luka kerananya, segeralah ia berlindung didalam sebuah kebun dan berdo'a kepada Allah: "Wahai Tuhanku kepada-Mulah hamba mengadu akan kelemahanku, sempitnya helahku dan hinanya aku di mata manusia.

Wahai Tuhanku Engkaulah yang lebih Pengasih dari semua pengasih, Engkaulah pelindung orang-orang yang lemah dan Engkaulah Tuhanku, kepada siapakah Engkau kan menyerahkan diri hamba ini? Kepada yang jauh dan menghadapiku dengan muka masamkah?, atau kepada musuh yang membenciku? Kalau Engkau tiada memurkaiku tiadalah mengapa, tetapi ma'af-Mulah yang sangat kudambakan. Aku berlindung dibawah cahaya-Mu yang menerangi segala kegelapan, dan atasyalah urusan dunia dan akhirat kan menjadi baik, agar janganlah kiranya Kau turunka murka-Mu kepadaku. Untuk-Mulah aku rela dihinakan asal saja Kau masih menyenangiku. Dan tiada daya upaya, tiada kekuatan kecuali dari-Mu."

Dia, meskipun seorang Rasul yang benderanya berkibar di seluruh pelosok dengan megah dan jayanya, suatu waktu naik keatas mimbar dan sambil

menangis ia hadapkan wajahnya kepada para pengikutnya dengan berkata: "Barangsiapa yang pernah terpukul punggungnya, maka inilah punggungku, balasah!!

Itulah pemimpin yang memimpin umat dalam segala bidang dan keadaan, Bila masa kelaparan datang, maka dialah dan keluarganyalah yang pertama kali lapar, dan orang yang terakhir sekali kenyang, bila kebetulan dalam masa ma'mur dan jaya. Kehidupannya tetap, tidak pernah bergeser dari tujuan hidupnya yang mulia dan tak pernah melanggar ikrarnya kepada Allah baik dalam beribadat maupun dalam berjihad, Sebelum datang sepertiga yang akhir dari malam ia bangun bermunajat kepada Allah, shalat sambil menangis. Harta datang kepadanya bertumpuk-tumpuk, tapi sedikitpun ia tak berubah, dan tak ada yang diambil untuk dirinya kecuali seperti yang diambil oleh yang paling bawah dan rakyat yang paling fakir, ketika ia wafat, didapati baju besinya telah tergadai pula .....

Ketika akhirnya seluruh negeri tunduk menerima da'wahnya dan sebahagian raja-raja hormat menerima seruannya kepada Islam, tak sedikitpun kesombongan dan kemegahan menghampiri dirinya.

Tatkala beberapa orang yang berkunjung kepadanya merasa gugup dan takut, maka dikuatkannya semangat mereka dengan katanya: "Jangan malu-malu dan jangan takut, ibuku adalah seorang perempuan yang

biasa makan daging kering (orang biasa).

Ketika semua orang yang menolak agamanya telah meletakkan senjata, dan mereka semua menyerahkan leher untuk menerima dengan rela putusan yang akan dijatuhkannya, sementara sepuluh ribu bilah pedang di tangan kaum muslimin beracun dan berkilat-kilatan di bukit-bukit, sekeliling Makkah, tetapi ucapan yang keluar dari lisannya untuk mereka hanyalah: "PERGILAH! KAMU SEMUA BEBAS. Bahkan dalam kemenangannya membuka negeri Makkah dia berjalan dengan menundukkan kepala, hingga susah bagi orang-orang untuk mengenali wajahnya, Sambil berulang-ulang membaca dengan mulut dan dalam hatinya ucapan syukur yang bercampur dengan tetesan air mata, dan dengan rendah diri menerima kejayaan dari Allah melangkah menuju ka'bah, diroboknyalah berhala-berhala sambil mengucapkan:

جا الحق وزهق الباطل  
ان الباطل كان زهوقا .

TELAH DATANG YANG HAQ DAN TELAH ROBOH YANG BATHUL SESUNGGUHNYA YANG BATHIL ITU PASTI ROBOH .....

MASIH ADAKAH KERAGUAN TERHADAP RISALAHNYA?



# TIADA PEMUJAHAN BERLEBIHAN TERHADAP DIRI NABI MUHAMMAD SAW

---

(Oleh Hj. Baharuddin Mansur)

---

Dari dahulu hinggapun sekarang, disamping ada orang-orang yang masih menaruh rasa kebencian serta menyebarkan fitnah yang mengandung rasa permusuhan terhadap Nabi Muhammad s.a.w. dengan berbagai ragam cara, antara lain dengan cara menuliskannya dengan riwayat hidup yang "gelap" dan "kotor", juga kita tidaklah dapat menutup mata atau manafikan masih adanya juga orang-orang yang memuja-muja Nabi dengan memuji-muji beliau diluar batas-batas apa yang diajarkan oleh Agama, sehingga secara langsung dan dengan disadari atau tidak telah merupakan pemujaan atau pendewaan terhadap diri beliau S.A.W.

Tidak sedikit dongeng-dongeng atau ceritera-ceritera tentang diri Rasulullah s.a.w., terutamanya disaat-saat kita menghadapi Hari lahirnya dan lain sebagainya, yang disampaikan dari generasi yang satu ke generasi yang lainnya, yang sudah merupakan

ceritera-ceritera atau dongeng-dongeng yang tiada asas langsung serta tiada kebenarannya sama sekali sehingga terkadang tersiarlah pula kefahaman yang karut, bahawa dengan hanya cukup menyebut-nyebut nama Nabi s.a.w. seseorang boleh mendapatkan jaminan untuk masuk kedalam syurga.

Memang bagi Nabi s.a.w. ada mukjizat (miracle), tetapi ini bukan bermakna menyebabkan dirinya menjadi manusia yang luar biasa, sehingga harus didewa-dewakan bahkan di sembah-sembah. Miracle atau mukjizat itu pada hakikatnya sebagaimana yang sering dinyatakan sendiri oleh beliau S.A.W. adalah dengan kehendak dan izin Allah s.w.t.

Pada masa Nabi s.a.w. wafat, dan berita perkara itu telah sampai tersiar ditengah-tengah ummat Islam, banyak yang tidak yakin dan percaya. Tidak yakin atau tidak percaya, sebab kononnya mustahil Nabi boleh wafat atau meninggal dunia. Bahkan Khalifah

Umar Bin Khattab sendiri waktu mendengar berita wafatnya Rasulullah s.a.w. itu, berkata dengan sangat marah: "Orang-orang yang mengatakan Nabi wafat adalah pengkhianat. Tidak! Nabi tidak wafat. Nabi s.a.w. sedang menghadap Tuhannya sebagaimana pernah terjadi dengan Nabi Musa a.s., dan akan segera kembali ketengah-tengah kita. Siapa yang masih berani mengatakan Nabi wafat, akan saya penggal lehernya!"

Dalam saat-saat yang penuh kebimbangan dan pertikaian semacam itu, datanglah Abu Bakar memberikan penjelasan kepada orang ramai, dengan berkata: "Kalau saudara-saudara menyembah Muhammad, maka sesungguhnya Muhammad sudah wafat (meninggalkan dunia). Tetapi kalau seandainya saudara-saudara menyembah Allah, DIA tetap abadi."

Selanjutnya Abu Bakar r.a. membacakan Surah Al Imran ayat 144:

Yang bermaksud: "Dan Muhammad itu tidak lain hanyalah seorang Rasul, telah dahulu daripadanya Rasul-Rasul; apakah kalau dia mati atau terbunuh, kamu akan berpaling kebelakang (murtad)? Padahal barangsiapa yang berpaling, dia tidak akan menyusahkan Allah sedikitpun dan Allah memberi ganjaran (pahala) kepada orang-orang yang bersyukur".

Setelah Abu Bakar r.a. selesai membacakan ayat tersebut diatas, maka Umar pun berkata: "Demi Allah! Setelah Abu Bakar membaca ayat itu, seolah-olah saya tidak dapat berdiri

lagi, kerana kaki saya sangat lemah. Saya hampir jatuh, sebab saat itulah baru saya insyaf, bahawa Rasulullah s.a.w., kekasih ummat, benar-benar sudah wafat (meninggal dunia)".

Untuk memelihara supaya jangan ada pemujaan atau pendewaan atau penyembahan dengan bentuk apapun terhadap diri Nabi s.a.w., maka Allah s.w.t. telah menurunkan ayat yang berbunyi:

Yang bermaksud: "Katakanlah (wahai Muhammad kepada manusia)! Sesungguhnya aku (Muhammad) adalah manusia seperti kamu juga".

(Qur'an s. 18 ayat 110).

Dalam kehidupan sehari-hari diriwatkan, bahwa pergaulan Rasulullah s.a.w. dengan keluarga serta sahabat-sahabatnya adalah sebagaimana manusia dengan manusia.

1. Bila Rasulullah s.a.w. datang di suatu tempat dimana para sahabat sedang berkumpul, maka beliau mengucapkan salam. Oleh sahabatnya disambut sambil berdiri memberi hormat. Maka Rasulullah s.a.w. menegur mereka, supaya jangan berdiri menghormati pemimpin-pemimpinnya. Dimana ada tempat yang kosong, maka disitulah beliau duduk sehingga tidak berbeda sedikitpun dengan sahabat-sahabatnya.
2. Pada satu ketika Rasulullah s.a.w. pergi kepasar untuk berbelanja, dan membeli sehelai seluar. Waktu itu bersama beliau ikut Abu

Hurairah. Setelah harganya dibayar, maka Abu Hurairah ingin menyatakan rasa cinta dan hormatnya kepada Nabi, sambil berkata: "Biarlah saya yang membawa se-luar itu, ya Rasulullah". Dengan tersenyum Rasulullah s.a.w. menjawab: "Yang empunya lebih pantas membawanya, ya Abu Hurairah."

3. Dirumah tangga Rasulullah s.a.w. sering membantu keluarganya meringankan pekerjaan mereka. Beliau suka membantu didapur, menghidupkan api atau mengambil air dan kalau ada pakaiannya yang perlu dijahit atau ditambal, dijahitnya sendiri atau ditambalnya sendiri, sekalipun Muhammad s.a.w. adalah seorang Rasul, seorang Kepala Negara dan seorang Jeneral yang sering memimpin pertempuran-pertempuran, sebagaimana yang dikatakan oleh Nehru: "King and Pope in one".
4. Diwaktu perang Badr, Rasulullah s.a.w. mengatur penempatan tentera disuatu tempat, yang dipandang oleh Hubab Al Anshary sebagai satu kesalahan besar. Hubab memberanikan diri bertanya kepada Rasulullah s.a.w., apakah Rasulullah s.a.w. menempatkan tentera di tempat itu dengan perantaraan wahyu atau tidak? Dijawab oleh Rasulullah s.a.w, bahawa penempatan itu menurut perhitungannya sendiri.

Dengan spontan saat itu Hubab Al Anshary menyatakan, bahawa penempatan tentera di tempat yang ditentukan Rasulullah s.a.w. itu akan mengakibatkan kerugian besar bagi pasukan umat Islam dan setelah dikemukakannya penjelasan-penjelasan sampai kepada detail-detailnya, maka Rasulullah s.a.w. menginsafi akan kekeliruannya dan menyuruh supaya tentera segera dipindahkan ke-tempat lain.

Nyata dalam soal-soal keduniaan ada sahaja terdapat kekurangan-kukurangan pada diri Rasulullah s.a.w. dan beliau pun pernah bersabda: "Kalau ada sesuatu yang mengenai agamamu, maka itu urusan saya; dan kalau ada yang mengenai soal keduniaanmu, dalam hal ini kamu lebih mengetahui." (Hadis).

Demikianlah beberapa contoh kita kemukakan, yang menunjukkan bahawa Rasulullah s.a.w. dalam pergaulan hidup sehari-hari berusaha, supaya dirinya jangan didewa-dewakan atau dipuja-puja atau disembah.

"Tiada yang patut disembah melainkan Allah."

Hanya Allah-lah yang patut disembah dan hanya kepada Allah-lah tiap-tiap hambaNya patut memohon ampun dan pertolongan.

Agama Islam adalah Agama amal. Agama yang mengajarkan, bahawa seorang Muslim hanya akan mendapat

---


pahala dan ganjaran dari amal yang dikerjakannya dan dari pengorbanan yang diberikannya. Adalah satu kekeliruan atau kesilapan yang sangat besar dan kefahaman yang tidak mempunyai dasar atau asas, apabila ada anggapan dikalangan ummat Islam, bahawa hanya dengan memuja atau membaca shalawat atas Nabi Muhammad s.a.w., seorang akan mendapat kehidupan yang baik diakhirat. Kesenangan hidup diakhirat hanya dapat dicapai dengan amal dan pengorbanan menurut pertunjuk dan aturan yang telah ditentukan oleh Allah s.w.t. Agama Islam adalah Agama per-

juangan, agama jihad. Muhammad s.a.w. hanya seorang utusan, seorang Rasul yang membawa Risalah dari Allah s.w.t. bagi ummat manusia, supaya manusia berbuat dan beramal sesuai dengan panduan-panduan yang diberikannya untuk mendapatkan kurnia serta keredhaan Allah s.w.t. didunia dan diakhirat. Lebih daripada itu tidak!

Dalam Islam tiada pemujaan terhadap diri manusia. Tidak terhadap Nabi, apalagi terhadap manusia biasa.

Sumber: Pembinaan  
Pribadi-pribadi muslim di Universiti  
Oleh: M Rusyad Nurdin

---



**“Kaum lelaki itu adalah pemimpin bagi kaum wanita, oleh kerana Allah telah melebihkan sebahagian mereka (lelaki) atas sebahagian yang lain (wanita) dan kerana mereka (lelaki) menafkahkan harta mereka. Perempuan-perempuan yang soleh ialah perempuan yang taat kepada suaminya, sambil memelihara kehormatannya di waktu suaminya tiada di rumah, sebagaimana Allah telah memelihara dirinya”.**

# PENTINGNYA AGAMA ISLAM DIAMALKAN BAGI MENJAMIN KEAMANAN DAN KEBAHAGIAN HIDUP

OLEH (HASAB)

## I Pendahuluan

Sebelum kita membahas isi tajuk ini dalam keseluruhannya, marilah kita tinjau dahulu apa yang dimaksud dengan agama.

Didalam kitab suci Al-Quran, surah Al-Imran ayat 19, Allah SWT berfirman:

”أَنَّ الدِّينَ عِنْدَ اللَّهِ  
الْإِسْلَامُ.”

• (آل عمران : 19)

Yang bermaksud: “Sesungguhnya Agama yang sah disisi Allah ialah Islam”.

Kemudian didalam Surah yang sama pada ayat 85 Allah SWT menerangkan:

ومن يبتغ غير الإسلام دينا

فلن يقبل منه وهو في الآخرة  
من الخاسرين

• (آل عمران : 85)

Yang bermaksud: “Dan barangsiapa yang cari (mau) satu agama selain dari Islam, maka tidak akan diterima (agama itu) daripadanya, sedang ia di Akhirat termasuk kedalam golongan orang-orang yang merugi.”

Dengan demikian kita difahamkan, bahwa ada 2 pengertian agama:

1. Ad-din (الدِّين), kata “din” pakai “alif-lam” yang bermakna Agama yang sah, iaitu Agama Islam.
2. Din (دين), kata “din” tidak pakai “alif-lam” yang bermakna suatu agama atau satu bentuk pandangan hidup (way of life) yang lain daripada Islam.

Termasuk kedalam kategori agama yang selain Islam itu 2 (dua) macam pandangan hidup:

- a. Yang masih biasa disebut agama, yaitu yang masih ada mengandung kepercayaan kepada Tuhan, akan tetapi sudah bercampur dengan macam-macam kepercayaan hasil persangkaan atau fikiran manusia, seperti agama Budha, Majusi, Yahudi dan Kristian.
- b. Yang tidak mengindahkan adanya Tuhan dan yang sama sekali tidak percaya kepada Tuhan seperti sekularisma, nasionalisma dan komunisma.

Akan tetapi Allah SWT, Maha Pencipta dan Penguasa makhluk manusia dan seluruh alam ini, telah menetapkan, bahawa diantara seluruh agama-agama itu hanyalah Islam sahaja Agama yang sah, manakala agama-agama atau pandangan hidup atau ideology lainnya tidak diterima atau ditolak adanya.

Bahkan, barangsiapa yang menganut atau mengikuti agama-agama yang bukan Islam itu, kelak akan merugi di hari Akhirat.

Adapun kerugian yang akan diderita Akhirat itu adalah akibat daripada kesalahan memilih cara hidup semasa didunia ini, bermakna, kerana selama hidup didunia tidak memakaikan cara-cara hidup sebagaimana yang telah diajarkan oleh Agama Islam.

## II. Perbedaan Islam dengan agama-agama lainnya

Agama Islam ialah Agama yang mur-

ni daripada Allah SWT, Agama yang 100% mengesakan Allah, yang didalamnya tidak terdapat sebarang campuran daripada hasil pemikiran manusia ataupun sebarang bisikan daripada makhluk-makhluk lain. Ia diturunkan oleh Allah sendiri kepada Nabi-Nabi yang telah dipilih-Nya sendiri, seperti Nabi Nuh, Nabi Ibrahim, Musa, Isa dan Muhammad SAW.

Manakala Agama suci yang telah diturunkan kepada Nabi-Nabi sebelum Nabi Muhammad itu telah banyak di selewengkan oleh ummat-ummatnya, ditambah atau dikurangi menurut kehendak nafsu mereka ataupun dicampur-campur dengan adat resam nenek moyang mereka, maka Allah SWT telah memilih dan melantik Nabi Muhammad SAW sebagai Nabi dan Rasulullah yang terakhir, dan kepada beliau itu Allah turunkan Agama Islam itu dalam bentuknya yang lebih sempurna dan lebih sesuai dengan keperluan hidup manusia sampai ke akhir zaman.

Kira-kira 80 hari sebelum wafat Nabi Muhammad, Rasulullah SAW., turunlah wahyu Allah yang terakhir kepada beliau yang menyatakan:

اليوم اكملت لكم دينكم  
واتممت عليكم نعمتي

ورضيت لكم الاسلام بيانا .

• (المائدة : ٣)

bermaksud: "Pada hari ini Aku telah sempurnakan kepada kamu

Agamamu, dan Aku telah cukupkan atas kamu nikmat-Ku, dan Aku telah redha Islam itu sebagai Agama buat kamu". (Surah Al-Maidah ayat 3).

Pesan ini dialamatkan kepada Muhammad Rasulullah SAW dan ditujukan kepada seluruh manusia sampai ke akhir zaman, supaya memperhatikan dan mengambil pedoman hidup, satu-satunya yang diredhai Tuhan, ialah Agama Islam.

#### Allah dan Makhluk.

Allah telah menciptakan seluruh alam ini, termasuk didalamnya manusia.

Allah adalah Al-Khalik, (Yang Mencipta) manakala seluruh alam, termasuk manusia, adalah makhluk, (yang diciptakan)

Allah itu Maha Pemurah dan Penyayang (Q.S. 1:3). Ia telah jadikan manusia itu dengan sebaik-baik kejadian (Q.S. 95:4).

Selain daripada bentuk tubuhnya yang istimewa, lengkap dengan panca inderanya, Allah lengkapi lagi dengan akal dan perasaan serta nafsu dan kemauan, yang memungkinkan manusia itu berkembang mencapai keinginannya.

Sementara kekayaan alam yang ada disekitar manusia itu, baik yang berada dipermukaan maupun yang terdapat didalam perut bumi ini Allah sediakan buat kepentingan manusia semuanya (Q.S. 2:29). Allah telah jadikan manusia ini sebagai khalifah dibumi ini (Q.S. 2:30).

Allah Maha Penyayang kepada manusia. Ia tidak suka makhluknya yang baik itu menjadi rusak atau

binasa.

Sebab itu Ia beri tuntunan, bagaimana memelihara hidup dan kehidupan, supaya boleh selamat didunia dan diakhirat.

Tuntunan hidup itu ialah Agama Islam, sebagaimana yang telah diredhaiNya itu. Ia mengandungi segala peraturan dan hukum-hukum yang sesuai sekali dengan kejadian manusia itu sendiri, tidak memberatkan manusia dalam pelaksanaannya, bahkan mendatangkan keselamatan dan kebahagiaan bagi hidupnya sendiri, baik perseorangan maupun masyarakatnya.

### **III Pokok-pokok Ajaran Islam**

A. Asas utama daripada ajaran Islam ialah "Aqidah", Tauhid, iaitu percaya kepada Allah Yang Maha Esa.

Allah itu tidak hanya satu dalam ujudnya, tetapi juga satu didalam pimpinan-Nya, bermakna, bahwa seluruh alam ini berada dibawah kekuasaanNya, dan bergantung hanya kepadaNya.

— Dia bekerja dengan sendirinya, Dia tidak memerlukan penolong ataupun kawan syarikat (kongsi), bahkan Dia tidak beranak dan tidak diperanakkan.

Kepercayaan Tauhid ini membebaskan manusia daripada sebarang ketergantungan kepada sesama manusia ataupun kepada makhluk lainnya baik yang gaib atau yang nyata.

— Setiap manusia yang percaya 100% kepada Kemaha-esaan Allah, memperoleh kemerdekaan diantara sesamanya, sebagai hak asasinya yang murni. Tidaklah boleh sese-

orang manusia memaksakan kehendaknya sendiri terhadap orang lain. Tidak boleh terjadi sebarang penindasan ataupun penajajahan.

- Semua manusia mempunyai hak yang sama daripada Allah dan juga mempunyai kewajipan yang sama terhadap Allah Yang Satu itu. Hak yang sama, iaitu sama-sama berhak untuk mendapatkan nikmat-nikmat Allah yang tersedia dimuka bumi. Kewajipan yang sama, ialah untuk mengabdikan kepada Allah. "Tidaklah Aku jadikan jin dan manusia, melainkan adalah supaya mereka menyembahKu" (Q.S. 51:56).

Maka semua do'a permintaan dari setiap manusia dipanjatkan langsung kepada Allah, tanpa perantaraan sebarang makhluk yang zahir maupun yang ghaib. Semua ibadat dan usaha dilaksanakan kerana Allah dan untuk mencapai keredhaan Allah.

- Semua makhluk wajib menundukkan diri hanya kepada Allah Yang Maha Esa itu.
- Maka ketahuilah, tidak ada sebarang tuhan yang layak disembah, kecuali hanya Allah" (Q.S. 47:19).

- B. Kepercayaan Tauhid itu memberi keberanian kepada setiap manusia: untuk menyatakan buah fikiran yang benar, samada membuat koreksi terhadap tindakan-tindakann yang salah.

Allah Yang Maha Esa itu mengingatkan, supaya manusia itu saling nasihat-menasihati dengan kebenaran dan kesabaran, demi

menjaga supaya jangan terjadi sebarang kerugian. (Q.S. 103:3)

- C. Aqidah Tauhid itu menyakinkan kepada manusia, bahawa Allah itu senantiasa memperhatikan keadaan makhluknya. Allah senantiasa melihat apa-apa yang dikerjakan oleh manusia setiap waktu dan masa, dan dimana juapun manusia itu berada. Allah selalu mendengar apa saja yang diucapkan oleh setiap manusia, bahkan Allah tahu apa saja niat dan maksud yang masih tersembunyi didalam hati seseorang.

- Kepercayaan tersebut merupakan satu kekuatan moral yang sangat berkesan bagi seorang manusia yang beriman untuk mengawal dirinya dan mengendalikan nafsunya daripada sebarang kelakuan dan tindakan yang salah.

- Bahkan kepercayaan itu mendorong seseorang supaya senantiasa jujur, berkata benar, berjalan lurus, sekalipun tak ada sebelah mata manusia pun yang melihatnya. Ia tidak akan mengeluarkan sebarang kata-kata yang kotor, sekalipun tak ada sebelah telinga manusia pun yang mendengarkannya.

- Kalaulah tidak kerana takut kepada Tuhannya, maka pemuda Yusuf bin Yakub akan jatuh kena rayu seorang wanita muda, isteri kepada seorang Menteri dalam Kerajaan Mesir dahulu kala. (Q.S. 12:24)

Kalaulah tidak kerana takut kepada Tuhannya, maka seorang budak penggembala kambing akan mudah saja menjualkan seekor diantara beratus-ratus kambing gembalaannya, tanpa setahu tuan-empunya-

nya, guna menambah penghasilannya sendiri. Bukankah tuannya tidak akan selalu memeriksa dan menghitung jumlah kambingnya yang banyak itu? (Kisah budak gembala di zaman Khalifah Abu Bakar).

Sekarang apa yang berlaku bagi orang-orang yang tidak percaya kepada Allah Yang Maha Esa itu, atau bagi mereka yang tidak mengindahkannya?

1. Seorang yang tak percaya kepada Allah Yang Maha Esa, mempunyai jiwa yang lemah. Ia tergantung kepada manusia lainnya atau kepada sesuatu yang dianggapnya kuat. Dengan mudah ia boleh berbuat sesuatu yang menjatuhkan maruah dan martabat dirinya, umpama: menyogokkan sejumlah wang kepada seseorang yang berkuasa demi mendapatkan perlindungan daripadanya atau kerana hendak mendapatkan suatu kedudukan dengan pengaruhnya, melacurkan diri, kerana sesuatu kesulitan hidup, dan sebagainya.
2. Seorang yang tak percaya kepada Allah, menetapkan sendiri pegangan hidupnya mengikut keputusan fikiran dan perasaan manusia. Maka hasil pekerjaan otak serta kemauan hawa nafsu daripada kebanyakan orang diantara mereka, dijadikan pegangan atau pedoman hidup semasa. Pedoman hidup ini berubah dari semasa kesemasa, sempena perubahan kerana perkembangan ilmu dan pengalaman manusia itu. Demikianlah timbulnya bermacam-macam isma, seperti: materialisme, sekularisma, sosialisma dan

komunisma.

- Hawa nafsu manusia adalah merupakan unsur jiwa yang tak pernah puas. Manakala ia dapat menguasai dan mengendalikan otak dan perasaan manusia, maka manusia itu boleh dibuatnya tak senang diam, demi untuk memenuhi kehendak-kehendaknya yang tak terbatas itu. Inilah yang menyebabkan seseorang selalu sibuk, tak kenal waktu siang ataupun malam, sering terlambat makan ataupun kurang tidur, sehingga boleh menjadikannya pusing atau pening kepala.
  - Bagi mereka yang sering mengalami kesukaran atau tak berjaya didalam usahanya, sering kandas dalam memenuhi kehendak nafsunya, timbulah rasa putus asa, hingga mengambil keputusan bunuh diri saja.
  - Timbulnya pemerasaan, pemerkoasaan, penindasan dan penjajahan adalah teresebab daripada dorongan hawa nafsu manusia yang tak terkendalikan.
3. Seorang yang tak percaya kepada Allah mudah dijangkiti penyakit sombong. Sedikit saja dia mempunyai kelebihan (ilmu, kekayaan, kedudukan) maka ia langsung membanggakan diri. Sebaliknya, manakala ia ditimpa kemalangan, ia langsung merasa keluh kesah dan berputus asa.
  4. Orang yang tak percaya kepada Allah, mudah sekali jatuh kelembah maksiat. Kalau saja tak ada mata orang lain yang melihat, ia mudah

melakukan sebarang kecurangan atau pencurian, bahkan perzinaan.

5. Orang yang tak percaya kepada Allah, atau mempunyai iman yang lemah adalah orang yang tak berani mengatakan yang benar dan tak berani menyatakan yang salah terhadap orang-orang atasannya, apatah lagi untuk maju kemedan perang guna mempertahankan keyakinannya.

### **B. Percaya kepada Akhirat**

1. Bahwa hidup didunia ini akan bersambung dengan hidup dihari Akhirat.

2. Masa hidup didunia singkat, dibanding dengan hidup dihari kemudian yang tidak akan berakhir.

3. Nasib manusia dihari Akhirat bergantung kepada amalnya semasa hidup didunia:

“Orang-orang yang beriman dan berbuat amal saleh mereka akan menjadi ahli syurga; mereka kekal didalamnya. (Q.S. 2:82) “Orang-orang yang kafir dan mendustakan ayat-ayat Kami (Allah), mereka itu adalah ahli neraka; mereka akan kekal didalamnya” (Q.S. 2:39)

- Kepercayaan ini senantiasa memperingatkan manusia, supaya berhati-hati memakaikan masa dan peluang selama hidup didunia ini, jangan sampai terbuang percuma, bahkan mestilah dipergunakan untuk perkara-perkara yang berfaedah, yaitu amal-amal yang mendatangkan kebaikan bagi diri, keluarga dan masyarakat. Dan janganlah sekali-sekali mendekati, apalagi akan membuat pekerjaan yang maksiat

dan yang mendatangkan kerugian bagi diri, keluarga dan masyarakat.

- Kepercayaan ini dapat mengawal diri seseorang untuk tidak terlalu cemas dalam kehidupan didunia, sehingga ia takut tak akan makan, lalu berlumba mengumpulkan kekayaan dan harta benda siang dan malam.

- Kepercayaan ini memperingatkan orang, supaya banyak-banyak berbuat amal saleh, berbuat jasa bagi kepentingan masyarakat, dengan jujur, tulus ikhlas kerana Allah, sama ada dengan harta ataupun dengan tenaga diri sendiri, sebab hanya inilah bakal persediaan baginya untuk dihari kemudian kelak.

- Kepercayaan ini memperingatkan seseorang, supaya tidak berbuat boros atau mubazzir, dan supaya senantiasa hidup sederhana, tetapi tidak kikir atau lokek. Sebaliknya, mereka yang tak percaya kepada hari Akhirat, senantiasa hanya memikirkan kehidupan didunia semata-mata. Mereka hanya berlumba mengumpul harta benda sebanyak-banyaknya untuk kepentingan hidupnya di dunia ini, dengan tidak kira nasib orang lain. Mereka mengira, bahwa bahagia itu terletak pada harta kekayaan sahaja.

“Ada padi, semua jadi: ada mas, semua kemas”. Begitulah cogan hidup mereka.

- Mereka yang tak percaya kepada Akhirat itu, selalu dikuasai oleh perasaan fana (musnah), perasaan akan pendeknya umur dibandingkan dengan impian dan harapan-harapannya. Pada waktu itu ia akan terdorong oleh hawa nafsunya un-

tuk mencapai sebanyak-banyaknya kenikmatan dunia didalam masa kehidupannya yang pendek itu.

Dia akan mati-matian berusaha merebut kesenangan-kesenangan dunia didalam pertarungan yang ganas, agar pada kesempatan satu-satunya yang ada padanya ini, ia dapat mencapai setiap apa yang mungkin diraihinya daripada keuntungan dunia. Dan tentu saja mereka didalam pertarungan yang sengit itu memperoleh keuntungan dan kenikmatan.

Akan tetapi keuntungan dan kenikmatan itu musnah akibat perebutan mati-matian yang mereka lakukan.

Mereka telah dikuasai oleh nafsu sampai kebatas yang membuat mereka hamba sahaja kepada hawa nafsu itu sendiri. Mereka patuh melayani keinginannya, dan tunduk melakukan perintahnya. Ujungnya mereka terjermus kedalam kancah permusuhan dan peperangan, kerana disebabkan persaingan dan perlumbaan itu, yang akhirnya memusnahkan kenikmatan hidup dunia itu sendiri.

Inilah yang sekarang tengah berlaku, di tengah-tengah masyarakat kapitalisma, sekularisma, komunisma dan nasionalisma-la-diniyah (kebangsaan yang tak beragama atau yang mengabaikan agama).

### C. Percaya kepada Malaikat

Malaikat, ialah makhluk yang ghaib, ciptaan Allah, yang sangat patuh terhadap Allah, seperti Jibrail, Malaikat yang menyampaikan

wahyu-wahyu Allah kepada Nabi Muhammad; Raqib dan Atid, iaitu malaikat-malaikat yang bertugas menyimpan rekod catitan-catitan amal baik dan amal jahat daripada setiap insan, dan lain-lain malaikat lagi.

Setiap manusia akan dihadapkan hadapan pengadilan Allah kelak di hari Akhirat, masing-masing dengan buku catitan amal-amalnya semasa hidup di dunia.

Firman Allah:

كُلُّ انْسان الزمناه طائره

في عنقه ، ونخرج له يوم

• القيامة كتابا يلقاه منشورا

• (الاسراء : ١٣)

“Dan tiap-tiap manusia Kami akan mengantungkan (catitan) amalannya ditengkoknya. Dan Kami akan keluarkan baginya pada hari Qiamat satu kitab yang ia akan mendapatinya dengan terbuka.” (Q.S. 17:13).

Tak seorangpun dapat berbohong ketika menjawab pertanyaan-pertanyaan didalam majlis pengadilan itu.

— Kepercayaan ini lebih memper-ingatkan lagi kepada setiap manusia, supaya mereka memikir dan menimbang lebih dahulu semasak-masaknya sebelum bertindak melakukan sesuatu.

Mereka yang tak percaya kepada malaikat-malaikat itu tentulah tidak

akan pernah merasa takut dan kluatir akan akibat-akibat daripada setiap perbuatannya, asal kepentingan dan kepuasan nafsunya tercapai.

• ( الغاية تبرر الوسيلة )

“Tujuan menghalalkan cara” (The aim justifies the means).

Demikian bunyi ajaran daripada Machiavelli didalam bukunya yang terbit pada tahun 1512M. Beliau ini adalah seorang ahli filsafat bangsa Italy, meninggal 1527, yang tidak percaya kepada Allah.

**D. Percaya kepada Rasul-Rasul**

Bahwa Allah SWT telah mengutus Rasul-Rasulnya, seperti Nuh, Ibrahim, Musa, Isa dan Muhammad SAW, guna menyampaikan ajaran-ajaran Islam kepada manusia, adalah suatu kenyataan sejarah yang tak dapat dibantah oleh sesiapaupun.

Bahwa kedatangan beliau-beliau itu adalah semata-mata untuk membawa ummat manusia kejalan yang lurus dan benar, sebagaimana diinginkan oleh Yang Mengutus sendiri, ialah Allah Yang Maha Esa itu.

Bahawa kalau terjadi penyelewengan daripada garis yang telah dibentangkan oleh para Rasul itu, adalah disebabkan kedegilan ummatnya sendiri lantaran dorongan hawa nafsu, sehingga mereka berani mengubah kata-kata, arti dan maksud daripada ayat-ayat yang telah dibacakan oleh para Rasul itu. Akhirnya timbul perselisihan-

perselisihan yang meruncing diantara sesama mereka, menimbulkan peperangan agama yang ratusan tahun lamanya, yang sampai sekarang masih dapat dirasakan akibat-akibatnya.

**E. Percaya kepada kitab-kitab suci, yang diturunkan Allah**

Bahwa Allah SWT telah menurunkan kitab-kitab suciNya kepada Rasul-Rasul, yang dipilihNya diantara para Nabi-Nabi, seperti Zabur kepada Nabi Daud, Taurat kepada Nabi Musa, Injil kepada Nabi Isa dan Al-Quran kepada Nabi Muhammad S.A.W.

Kitab-kitab suci yang asli itu memperingatkan kepada seluruh ummat manusia didunia ini, akan kesatuan kepercayaan didalam Agama, bahwa tiada Tuhan yang layak disembah kecuali Allah Yang Maha Esa. Tidaklah ia beranak atau diperanakkan dan tiada syarikat bagiNya dengan sesuatupun.

Jika kepercayaan ini dipatuhi oleh semua ummat beragama didunia ini, maka akan terciptalah persatuan dan kesatuan serta kedamaian.

Tetapi, amat sayang, bahwa masih saja banyak diantara manusia-manusia yang tidak mau mengakui kesatuan prinsip Agama yang telah dibawakan oleh para Nabi, sehingga mereka membezakan diantara Nabi-Nabi itu, dan kerananya memper-tikaikan pula tentang isi daripada kitab-kitab suci itu, bahkan ada pula diantara mereka yang menolak kedatangan Nabi Muhammad dengan kibat sucinya, yang telah diisytihar-



*Beramal saleh menyapurnakan kebahagiaan hidup.*

kan oleh Allah SWT sendiri sebagai Kitab suci yang terakhir, dan yang menggantikan semua kitab-kitab suci sebelumnya, untuk dipakai dan dipatuhi oleh semua ummat manusia sampai akhir zaman.

Keingkaran sebahagian manusia inilah jua yang menyebabkan timbulnya pertelingkahan dan terganggunya kedamaian diatas dunia ini.

#### **F. Percaya kepada Qadha dan Qadar**

Bahwa Allah SWT telah menciptakan hukum-hukum tentang kejadian alam ini dari semula jadinya. Bahwa seluruh gerak samada perubahan yang terjadi tertakluk kepada hukum-hukum itu, kecuali kalau Allah Ta'ala sendiri mau menunjukan sesuatu kejadian yang luar

biasa, sebagaimana mu'jizat-mu'jizat yang pernah diberikannya kepada para Nabi dan RasulNya.

Kepercayaan ini menyakinkan ummat manusia yang beriman akan kesempurnaan Allah dalam segala hal. Bahwa ilmu-ilmu yang telah pernah dipunyai oleh manusia diatas dunia ini barulah merupakan ibarat setitik air daripada lautan. Bahwa apa saja yang direncanakan oleh manusia, yang bagaimanapun pakarnya, namun ketentuan dan keputusan akhir berada di "tangan" Allah, kerana, hanya Dialah sahaja yang lebih mengetahui akan hakikat kejadian daripada seluruh alam raya ini.

Kepercayaan ini mengawal manusia supaya jangan sekali-kali bersifat

sombong, manakala merasa diri sudah pandai, merasa sudah kaya atau merasa sudah berkuasa.

Konsep kepercayaan ini memperingkatkan manusia supaya selalu bersungguh-sungguh dan berhati-hati dalam berusaha dan bekerja, dan supaya selalu ingat kepada Kemaha-Kuasaan Allah dan selalu memohon petunjuk serta perlindungan daripadaNya.

Manakala mereka yang tidak menaruh kepercayaan kepada Qadha dan Qadar daripada Allah SWT merasa dirinya sudah sempurna, perfect. Segala tindakannya sudah pasti, segala kajiannya sudah benar. Mereka menjadi sombong, bahkan tidak mau mengakui kekurangan dan kesalahan sendiri.

Inilah yang menyebabkan kebinasan didunia ini.

Itulah 6 rukun daripada 'Aqidah Islam', yang sangat diperlukan

didalam hidup dan kehidupan manusia, demi membentuk peribadi dan masyarakat yang damai, sentosa dan bahagia.

Adapun asas-asas lainnya daripada Agama Islam mengandung masalah-masalah syari'iyah dengan segala hukum-hukumnya, Ibadah dengan segala peraturannya dan Akhlaq dengan segala nilai-nilai hidup yang sangat berguna bagi pembentukan manusia seutuhnya.

Agama Islam adalah satu system Ilahi yang complete bagi mengatur hidup dan kehidupan ummat manusia dalam segala aspectnya: sosial, politik, ekonomi, kebudayaan dan keamanan, menuju kebahagiaan hidup diatas dunia dan kebahagiaan hidup di Akhirat.

Wabillahittaufiq walhidayah,  
Wassalamualaikum Warahmatullahi  
Wabarakatuh.



---

# SAJAK

---

*Mari kita dengarkan pula rangkuman puisi yang telah dibacakan oleh Datin Doktor Noor Laily bte Dato' Abu Bakar, Pengerusi daripada Institut Nury, Kuala Lumpur, siapa yang telah memberi ceramah tentang Pembangunan Cemerlang Keluarga dan kanak-kanak, dalam kursus 3 hari yang diadakan di I.D.B., Kuching, bersempena dengan Musyawarat Perwakilan BINA yang ke 8 baru-baru ini.*

---

## "SE CECAH CAHAYA ..."

Timang tinggi-tinggi  
Sampai Cucur Atap  
Belum tumbuh gigi  
Sudah pandai Baca Kitab

Timang tinggi-tinggi  
Sampai Pucuk Labu  
Belum tumbuh gigi  
Sudah pandai Pakai Baju

Anak, adalah CAHAYA MATA  
Curahkanlah segala KASIH SAYANG padanya  
Kami di NURY hanya dapat berkata  
IBU dan BAPAlah orang yang UTAMA

KASIH SAYANG tidak boleh dijual-beli  
Apa yang penting - PEERASAAN, RASA dan SIKAP DIRI  
10 minit, 20 minit, 30 minit dalam sehari  
Tentu tak sukar kita memberi

KASIH SAYANG membina MARUAH dirinya

---

---

PENGALAMAN dan PELAJARAN memperkayakan hidupnya  
Berilah peluang dia BELAJAR  
Dia MENEROKA  
Dia MENCUBA dan  
Dia BERUSAHA  
Tugas kita hanya MEMBIMBING, MERANSANG senantiasa  
PELUK, CIUM, PUJILAH dia  
Walaupun GAGAL tetapi MENCUBA  
DIA adalah DIA  
Tak perlu di BEZA-BEZA

Jika anak melakukan KESALAHAN  
Apa yang ia perlu ialah KEFAHAMAN  
TEGUR dia dengan tegas  
Tetapi dengan penuh SAYANG  
Tentu ini merupakan PERANGSANG

Anak adalah PEMBERIAN TUHAN  
Jasa kita padanya tak memerlukan BALASAN  
Apa yang penting bila DEWASA  
Dia menjadi seorang MANUSIA

Bukan senang MEMBESARKAN anak  
Banyak CABARAN di depan kita  
Tetapi ingat .....

SE CECAH CAHAYA di malam yang GELAP  
Sama ertinya SE TITIK EMBUN di Gurn Sahara.

DATIN DR NOOR LAILY BTE DATO' ABU BAKAR  
PENGERUSI & PENGASAS  
INSTITUT NURY  
Kuala Lumpur  
12 September, 1986.

## MIMBAR HADIST

عَنْ عَبْدِ اللَّهِ بْنِ عَمْرٍو رَضِيَ اللَّهُ عَنْهُمَا ، قَالَ : كُنْتُ أَكْتُبُ كُلَّ شَيْءٍ أَسْمَعُهُ مِنَ النَّبِيِّ صَلَّى اللَّهُ عَلَيْهِ وَسَلَّمَ أُرِيدُ حِفْظَهُ ، فَنَهَيْتَنِي قُرَيْشٌ ، وَقَالُوا ، تَكْتُبُ كُلَّ شَيْءٍ تَسْمَعُهُ رَسُولَ اللَّهِ صَلَّى اللَّهُ عَلَيْهِ وَسَلَّمَ بِشَرِّ يَتَكَلَّمُ فِي الْغَضَبِ وَالرَّضَى ؟ فَأَمَسَكْتُ عَنِ الْكِتَابَةِ ، فَذَكَرْتُ ذَلِكَ لِرَسُولِ اللَّهِ صَلَّى اللَّهُ عَلَيْهِ وَسَلَّمَ ، فَأَوْمَأَ بِأَصْبَعِهِ إِلَى قَبْلِهِ فَقَالَ : أَكْتُبِ فَوَالَّذِي نَفْسِي بِيَدِهِ مَا يَخْرُجُ مِنْهُ الْإِحْقَ .

• (رواه ابو داود )

### Artinya:

Dari Abdillan bin Amr R. Anhuma, ia berkata: Sentiasa aku menulis segala sesuatu yang aku dengar dari Nabi s.a.w. dengan tujuan untuk menghafalnya, lalu orang-orang Quraisy melarang aku berbuat demikian dan berkata: "Patutkah engkau menulis segala yang engkau dengar, sedang Rasulullah s.a.w. adalah seorang manusia yang bercakap dalam masa marah dan dalam masa suka?" Setelah itu akupun hentikan menulis, kemudian aku menyampaikan hal itu kepada Rasulullah s.a.w., lalu baginda mengisyaratkan dengan jari pada mulutnya seraya berkata, "Tulislah, kerana demi Allah yang diriku dalam kekuasaanNya, tidak keluar dari mulutku ini, melainkan yang benar."

(Hadist riwayat Abu Daud)

### Kandungan hadis:-

1. Penulisan hadis-hadis Rasulullah s.a.w. telah dilakukan oleh sahabat-sahabat di zaman Nabi.
2. Baginda mengizinkan supaya hadis-

hadis itu ditulis.

3. Segala yang disampaikan oleh Nabi s.a.w. adalah benar.
4. Anggapan berlakunya kesilapan pada penyampaian baginda adalah

tidak berasas.

### **Pertama: Penulis Hadis-Hadis Nabi**

Rasulullah s.a.w. diutus oleh Allah Taala dengan membawa syariat Islam kepada seluruh umat manusia. Beliau sebagai seorang Nabi dan Rasul yang dilantik oleh Allah s.w.t. maka segala yang terbit dari baginda, samada perkataannya atau perbuatannya ataupun taqirinya (pengakuan beliau) mengenai perkara-perkara syariat adalah semuanya benar tanpa sebarang keraguan. Semuanya mengandung pertunjuk dan pengajaran bagi ummat manusia yang mahu beriman kepadanya.

Sebahagian besar dari sahabat-sahabat baginda yang menerima hadis-hadis itu menghafalnya. Ada juga diantara sahabat-sahabat yang pandai menulis, dan mencatatkan hadis-hadis yang didengar dari baginda. Tetapi walau bagaimanapun, bagi sahabat-sahabat nabi, cara menghafal hadis-hadis itu dipandang lebih menyakinkan daripada menulisnya, dan lebih terkawal dari kesilapan, kerana tabiat semulajadi orang Arab itu kuat ingatannya.

Dengan usaha sahabat-sahabat yang suka membuat catitan-catitan bertulis, banyaklah hadis-hadis Rasulullah s.a.w. yang telah terkumpul dalam catitan bertulis pada masa hidup beliau.

### **Kedua: Baginda mengizinkan**

### **supaya hadis-hadis itu ditulis**

Penulisan hadis-hadis Rasulullah s.a.w. itu bukanlah dilakukan oleh sahabat-sahabat secara rahsia, tetapi dilakukan setelah mereka mendapat kebenaran dari baginda. Sahabat-sahabat Nabi dengan sifat kejujuran mereka, tidak melakukan suatu perkara yang berhubung dengan hadis-hadis Rasulullah s.a.w. khasnya dan dengan perkara agama amnya, tanpa mendapat kebenaran dan keizinan dari beliau s.a.w.

### **Ketiga: Segala yang disampaikan oleh beliau adalah tetap benar.**

Apa jua yang disampaikan oleh Rasulullah s.a.w., tidak perlu diragukan lagi kerana semuanya benar, dan wajib ditaati serta dijadikan pelajaran dan pedoman dalam kehidupan kita.

Nabi Muhammad s.a.w. sebagai seorang Rasul yang telah dipilih oleh Allah s.w.t. untuk menyampaikan hukum-hukum Islam kepada ummat manusia, sudah tentu dipeliharanya dari perkara-perkara yang boleh menghalangi tugasnya, dan yang boleh merusakkan apa yang hendak disampaikanya itu.

### **Keempat: Anggapan berlakunya kesilapan pada penyampaian baginda adalah tidak benar.**

Ada anggapan, dari pihak musuh-musuh Islam, bahawa apa yang diterangkan oleh Rasulullah s.a.w. itu

tidak boleh dipegang dan tak boleh ditulis semuanya, kerana baginda, sebagai manusia mempunyai juga sifat-sifat kekurangan. Maka tentulah tidak mesti betul segala yang diterangkannya, kerana beliau tidak luput dari perasaan marah dan suka, sedang perasaan-perasaan ini kerap kali dapat mempengaruhi jiwa seseorang.

Anggapan yang demikian telah timbul pada masa hayat baginda, dan beliau telah menerangkan tentang kesalahan anggapan mereka itu, dan menyuruh mereka untuk menulis apa-apa yang baginda sampaikan.

Anggapan yang nyata salahnya itu, secara langsung sudah menyentuh kedudukan kerasulan baginda. Kerana setiap keraguan terhadap kebenaran kata-kata yang disampaikan oleh Rasulullah s.a.w., bermakna ragu-ragu terhadap kerasulan baginda.

Ada juga anggapan bahawa kesilapan berlaku pada penyampaian Rasulullah s.a.w. dengan alasan baginda pernah lupa.

Memang benar, baginda pernah lupa, tetapi dengan itu tidaklah boleh difahamkan bahawa baginda boleh berlaku lupa pada segala perkara yang hendak disampaikannya. Adapun "lupa" yang pernah berlaku ialah "lupa" yang diprintahkan baginda melakukannya untuk menimbulkan suatu hukum, seperti lupanya baginda membaca "tahyat awal dalam salat", untuk menerbitkan hukum "sujud sahwi", secara amali.

Perlu diingat, bahawa perkara-

perkara yang tidak harus berlaku silap pada Nabi s.a.w., ialah perkara-perkara yang dibawanya dari Allah Taala, dalam hukum-hukum syariat agama. Adapun perkara-perkara keduniaan, ataupun perkara-perkara kehidupan sehari-hari boleh jadi baginda berlaku silap padanya dan mungkin sahaja baginda tidak mengetahuinya, sebagaimana beliau sendiri pernah bersabda, maksudnya, "Kamu lebih mengetahui mengenai perkara-perkara keduniaan kamu."

"Perkara-perkara keduniaan", itu ialah perkara-perkara yang dapat diketahui oleh manusia berdasarkan penyelidikan serta kajian ilmiah atau berdasarkan pengalaman.

Mengenai perkara-perkara yang demikian, terpulanglah kepada seseorang membuat kajian sendiri dengan apa cara jua, asalkan tidak bertentangan dan tidak bercanggah dengan hukum-hukum Islam yang ada.

Tentang sabda baginda: "Kamu lebih mengetahui mengenai perkara-perkara keduniaan kamu itu." Maka itu adalah untuk mengajar manusia, bahawa apa-apa yang mereka gunakan dalam cara-cara bertani, bertukang, dan alat-alat teknik terserahlah kepada pengetahuan dan pengalaman mereka sendiri, dan Tuhan tidak melarang mereka membuat menurut cara-cara mereka sendiri asalkan hukum-hukum syarak tidak dilanggar dan akhlak yang mulia dijaga dan diperlihara dengan sebaik-baiknya.

Tugas Rasulullah s.a.w. tidaklah

seperti tugas guru-guru sekolah dan pakar-pakar perusahaan. Rasulullah diutus bukan untuk mengajar satu persatu mengenai ilmu pengetahuan yang berhubung dengan cara-cara mengambil faedah dari alam langit dan bumi serta segala isinya untuk kehidupan dunia.

Kalau terdapat dalam apa yang disampaikan mengenai yang demikian maka itu hanyalah untuk dijadikan bukti yang menunjukkan wujudnya Allah Taala, dan kekuasaannya serta kebijaksanaan, dan kemudahannya.

Adapun ilmu pengetahuan yang berkenaan dengan angkasa lepas, meliputi matahari, bulan, bintang dan yang berhubung dengan bumi dan harta-harta yang terpendam didalam-

nya, demikian juga ilmu pengetahuan yang berkenaan dengan pertanian, perternakan, perikanan dan sebagainya, maka semua itu tidaklah harus diterangkan satu persatu oleh Rasulullah s.a.w., tetapi terserahlah kepada manusia berakal fikiran serta memberinya tenaga dan ikhtiar untuk mencapai ilmu pengetahuan dan kepandaian bagi mendapat kesempurnaan hidup mereka. Dan Allah pun ada menyebutkan garis besar ilmu-ilmu pengetahuan didalam Al-Quran sebagai pendorong bagi manusia untuk menerokainya.

(Syed Mohammad bin Alwi)

**Berapa banyaknya penduduk negeri yang telah derhaka kepada pemerintah Allah dan rasulNya. Maka Kami periksa kesalahan mereka dengan sangat teliti dan Kami siksa mereka siksa yang sangat bersangatan.**

**Maka mereka rasailah bahaya perbuatan mereka sebagai kesudahan dari kerja mereka yang rugi.**

**Allah telah menyediakan azab yang sangat berat bagi mereka itu sebab itu wahai orang-orang yang mahu berfikir dan beriman takutlah kamu kepada Allah sesungguhnya Allah telah menurunkan peringatan bagi kamu.**



*Ruang Muslimah*

# PEJUANG- PEJUANG WANITA ISLAM

Sejarah pejuang-pejuang wanita Islam membentangkan beberapa kisah yang menceritakan keberanian dan pengurbanan mereka dalam memperjuangkan dan mempertahankan negara, harta dan kanak-kanak sehingga seorang dari saudara wanita kita mendapat pangkat dan kemuliaan dari apa yang ia perjuangkan dengan jiwa raganya dalam membela Rasulullah SAW. Mereka keluar di Medan peperangan bukan setakat merawat pejuang-pejuang yang luka parah sahaja, tetapi di beberapa ketika yang lain pula mereka juga menyertai pertempuran dan berjaya mencatatkan sejarah yang abadi dan berkesan, mereka juga menggalakkan anak-anak mereka supaya turut serta dalam peperangan dan memberangsangkan suami-suami mereka supaya berjihad agar mereka dapat berbangga dengan apa yang di perjuangkan itu. Di antara mereka ada yang memperkatakan:

"Di antara kami seorang wanita yang di kenal dengan Khansa berkata dengan kata-katanya yang penuh semangat dan termasyhur ketika

menyaksikan empat orang anaknya yang gugur syahid dalam peperangan: 'Alhamdulillah, syukur kerana memuliakan aku dengan kematian mereka' "

Dalam sejarah kita beberapa ketika yang lalu saudara-saudara pejuang wanita kita telah mencatat sejarah yang gemilang dalam perjuangan dan jihad bagi melawan pemberontak-pemberontak, penjajah dan penderhaka. Dalam pada itu mereka juga telah memberi contoh yang baik dalam pengorbanan keikhlasan dan memperjuangkan jiwa dan raga di jalan Allah. Contohnya di Syria, Palestin, Lubnan dan Afghanistan. Dan sekarang tibalah masanya bagi kita memperlihatkan peranan kita, apakah yang kita akan sumbangkan untuk sejarah? Begitu juga saudara-saudara wanita muslimah kita telah mencatatkan sejarah gemilang yang menggambarkan kepada kita tentang keteguhan keazaman wanita ketika mempertahankan agama Allah dan semangatnya untuk berjihad dengan penuh ikhlas dan jujur. Sesungguhnya wanita muslimah tidak akan memper-

lihatkan berangnya kecuali ketika mempertahankan hak Allah SWT sambil memohon pertolongan dari Rabbul-alamini di samping berusaha menggunakan seluruh tenaganya untuk mencapai kebenaran itu, mereka berusaha dengan penuh gigih dan kuat, sehingga setelah berjaya mencapai kebenaran baharulah mereka merasa senang dan tenang sambil menunjukkan kemesraan dan mahabbah kepada semua.

Kami muslimah percaya akan kemenangan Allah itu, sebagaimana yang termaktub di dalam Kitab Suci Al-Qur'an-nulkarim, Surah Al Mujadilah ayat 21:

كتب الله لا غلبنا اناورسلي

• ان الله قوى عزيز •

• (المجادلة: ٢١) •

Maksudnya: "Allah telah menetapkan; 'Aku dan Rasul-RasulKu pasti menang'. Sesungguhnya Allah maha kuat lagi perkasa".

Tidak ada ketakutan pada Agama Allah, bahkan yang kita takuti diri kita dan amalan yang kita lakukan itu tidak sampai mencapai kemenangan disisi Allah SWT. Dan untuk mencapai semua ini kita mesti patuh akan perintah dan suruhan Rasulullah SAW dan kembali kepada ajaran agama kita kerana inilah hakikat hidup kita.

Peristiwa kepahlawanan wanita muslimah yang bersejarah juga telah menceritakan secara terperinci kegiatan-kegiatan yang telah mereka lakukan dari masa ke semasa. Mereka tidak menolak untuk melakukan kerja-kerja yang susah seperti menggali kubur dan berusaha mencari makanan untuk tentera,

malahan mereka bukan hanya merawat tentera yang cedera di bahagian belakang, tetapi mereka juga mengusung tentera yang cedera keluar dari medan peperangan. Kadang-kadang mereka turut sama membantu dalam medan peperangan kerana tidak puas hati dengan hanya bertindak memberi semangat kepada askar-askar dalam melakukan peperangan. Pendek kata, tidak ada tugas yang terlalu berat atau yang tidak menyeronokkan untuk mereka lakukan. Ini membuktikan bahawa muslimah yang lemah dapat melakukan tugas tersebut.

Islam juga menggalakkan wanita-wanitanya berjihad, kerana menurut Bukhari Saidatina Aisyah r.a. semasa dalam peperangan Uhud beliau membawa air di dalam sebuah beg kulit untuk di berikan kepada askar-askar yang tercedera. Ummu Salim juga sama-sama menolong beliau.

Abu Nayeem pula meriwayatkan bahawa dalam peperangan Khaibar, enam orang wanita Madinah telah turut serta dalam barisan tentera-tentera Islam. Rasulullah SAW tidak mengetahui akan hal ini sehinggalah beliau di beritahu. Apabila Baginda di beritahu, Baginda berasa marah dan bertanya mengapa turut serta. Wanita-wanita itu menjawab dengan mengatakan bahawa mereka membawa ubat-ubat yang akan di gunakan untuk merawat askar-askar yang cedera, mereka akan mencabut anak panah dari tubuh askar-askar dan menyediakan makanan untuk mereka. Rasulullah SAW pun membenarkan mereka mengiringi askar-askar tersebut setelah Khaibar ditawan, Rasulullah SAW memberikan sebahagian dari harta rampasan perang kepada wanita-wanita ini.

---

Dan di antara pejuang-pejuang wanita muslimah yang terkemuka di zaman Rasulullah SAW, Safia emak saudara Rasulullah SAW dan juga ibu Zubair. Dalam peperangan Khandaq, sedang Rasulullah SAW dan para sahabat berperang melawan orang-orang Yahudi, Bani Quraizah telah mara ke tempat wanita dan kanak-kanak muslim. Tidak ada seorang pun tentera Islam yang dapat melindungi mereka dari Banu Quraizah. Seorang Yahudi cuba mendekati mereka, Yahudi itu di khawatiri akan mengkhianati mereka dengan membenarkan Banu Quraizah menyerang sebaik-baik sahaja mereka mendapat peluang. Memandangkan keadaan itu Safia pun menyuruh Hassan bin Thabit membunuh Yahudi itu. Perhatikan Hassan teragak-agak untuk melakukannya, Safia sendiri turun bersama sebatang kayu khemmah di tangannya dan terus membunuh Yahudi tadi dengan kayu itu. Mengikut ahli sejarah Ibnu Athir inilah kepahlawanan pertama yang di lakukan oleh seorang wanita muslimah.

Sementara Ummu Salim Ibu Anas

bin Malik (hamba Rasulullah SAW) selalu menemani Rasulullah SAW ke medan peperangan. Apabila Talib bin Umair memberitahu ibunya bahawa beliau telah memeluk Islam, ibunya pun berkata: "Kamu telah menyebelahi lelaki yang benar, jika aku mempunyai kekuatan dan keupayaan seperti lelaki, aku akan lindunginya dan melawan untuknya."

Inilah sejarah ringkas kepahlawanan wanita muslimah yang hidup di zaman Rasulullah SAW yang berkobar-kobar semangatnya di dalam memperjuangkan hak Allah dan Rasulnya dan menegakkan syi'ar Islam. Semoga menjadi tatapan kita bersama. Dan ini juga hanyalah satu pandangan sepintas lalu mengenai wanita muslimah yang telah lalu. Marilah kita lihat pula apakah yang akan di sumbangkan dan di tinggalkan oleh wanita muslimah di masa kini untuk di jadikan catatan sejarah Islam.

Wabillahaufik walhidayah.


Di susun oleh:  
Ustazah Rohani Awi  
Dipetik dari beberapa buah Majalah Dakwah Islamiah.

---

**Allah akan berfirman pada hari Kiamat:  
Manakah orang-orang yang berkasih  
mesra kerana memuliakan kebesaran  
ku? Hari ini aku melindungi mereka dan  
tiada lindungan hari ini kecuali lindungan  
oleh ku - Diriwayatkan oleh Muslim.**

---

# **KISAH TERBUNUHNYA KELUARGA ALFARUQI**



*Dr. Ismail Al Faruqi*

Isnin, 28 May 1986 di Universiti Temple, Philadelphia, Amerika Syarikat, Prof. Dr. Ismail Al-Faruqi (65) berbuka puasa bersama ahli-ahli daripada Himpunan Mahasiswa Islam Amerika Utara. Selepas itu Faruqi pulang kira-kira pukul 11.00 malam kerumahnya. Pukul 2.30 dinihari, ia dan isterinya, Dr. Lamia Faruqi dibunuh dirumahnya sendiri, oleh seorang yang hingga kini belum diketahui identitinya. Salah seorang anak perempuannya, Anbar (27), kahwin, tengah hamil, berserta anaknya yang berumur 18 bulan, tergeletak dilantai bilik dalam keadaan luka parah. Anak perempuan daripada Allahyarham yang kedua, Tayma (25), alhamdulillah, terselamat. Kerana ia, berdua dengan keponakanannya, dapat bersembunyi dibawah kolong tempat tidur, ketika peristiwa pembantaian itu terjadi.

Seorang lelaki, tinggi dan besar (5 kaki 11 inci), berat 100 kg merempuh masuk rumah melalui pintu belakang pada pukul 2.15 dinihari. Waktu itu Dr Lamia sedang menyiapkan makanan untuk sahur. Tiba-tiba orang kulit putih itu menyerbu masuk bilik dapur dengan pisau terhunus, langsung menikam isteri Faruqi sebanyak 8 tusukan. Ketika peristiwa itu terjadi, Anbar telah bangun, dan berteriak memanggil ayahnya yang sedang berada dibilik tingkat atas. Pembunuh berdarah dingin itu menglihkan perhatiannya kepada Anbar, yang sedang mendukung anaknya. Anbar pun diserang dan mendapat luka-luka berat.

la ditinggalkan terbaring dilantai. Kini giliran Prof. Dr. Faruqi pula. Si pembunuh tidak buang kesempatan menyerang Dr. Faruqi. Beliau memberikan perlawanan, tapi .... 13 tusukan pisau belati bersarang ditubuh beliau, menyebabkan Dr. Faruqi tak berdaya dan mengakhiri hayat dalam syahid.

Tragedi ini telah mengemparkan dunia Islam. Pemerintah Pakistan, Jordan dan Malaysia sangat sedih dengan terbunuhnya Prof. Dr. Ismail Faruqi berserta isterinya. Demikian pula perasaan para sarjana Islam lainnya. Sebab Prof. Dr. Ismail Faruqi sangat terkenal diantara mereka.

Di Universiti Temple, Faruqi mendirikan satu Fakulti Kajian Islam, yang kemudian beliau sendiri menjadi Dekan Fakulti tersebut. Ia juga mengajar di Universiti Al-Azhar, Mc Gill dan Universiti Syracuse, New York. Dia juga menjadi fellow pada Institute Penyelidikan Islam Pakistan, disamping ia bertugas diperbagai Lembaga Akademik Islam. Dia juga merupakan pendiri berbagai organisasi Islam, termasuk International Institute of Islamic Thought, Association of Muslim Social Scientist dan lain-lain sebagainya. Faruqi juga merupakan penulis Islam yang produktif. Lebih dari 25 buah karyanya, yang diterjemahkan kedalam berbagai bahasa. Termasuk karya-karya tentang Islam, Judaisma, Kristian dan agama-agama dunia lainnya.

Faruqi juga mendirikann Islamic Studies Group of American Academy of



*Al Faruqi bersama En. Anwar Ibrahim sewaktu Menteri Kebudayaan Malaysia.*

Religion dan memimpinya selama 10 tahun. Ia pernah pula menjadi Wakil Ketua Internatioanal Religious Peace Colloquium, The Muslim-Jewish, Chris-

tian Conference dan lain-lain. Karya monumental Faruqi yang lain ialah ATLAS OF ISLAMIC CULTURE AND CIVILIZATION yang segera akan diter-

bitkan oleh Mc Millan, dia juga berperan sebagai co-editor buku HISTORICAL ATLAS OF RELIGIONS OF THE WORLD yang diterbitkan Mc Millan pada tahun 1974.

Dr. Ismail Faruqi dilahirkan pada tahun 1921 di Jafa, berasal dari sebuah keluarga Palestine yang terkenal. Dia bertukar kerakyatan Amerika Serikat dan berkahwin dengan Dr. Lamia Al-Faruqi, yang lahir di Amerika. Dari perkahwinan itu Al-Faruqi memperoleh 1 putera and 3 puteri.

Tiga bulan yang lalu, puteranya (22) yang belajar di New Mexico, meninggal dalam keadaan mencurigakan. Setelah seminggu dimakamkan, pihak Universiti New Mexico membuat pernyataan, bahawa ditubuhnya terdapat makanan-makanan beracun. Faruqi sabar dan tabah hati menghadapi musibah, dan mengembalikan seluruh persoalan kepada Allah Yang Maha Kuasa.

Kemudian, siapa sebenarnya yang membunuh Faruqi dan isteri dan mencederakan seorang anak perempuannya? Dan mengapa?

Memang Prof. Dr. Ismail Faruqi mempunyai pandangan tersendiri mengenai beberapa persoalan yang dihadapi ummat Islam. Tetapi beliau tidak pernah terlibat dalam soal-soal politik. Ia adalah seorang ahli akademik. Begitu pula isterinya, Dr. Lamia Faruqi. Kerananya pembunuhan terhadap mereka tetap merupakan sesuatu yang mencurigakan dan spekulatif.

Beberapa kalangan Mahasiswa Islam di Amerika Serikat menghubungkan peristiwa itu dengan kegiatan kaum ekstrimis daripada Liga Pertahanan Yahudi (JDL). Pembunuhan terhadap Mr. Alex Awdah, staff committee Arab Amerika Anti Diskriminasi Racial, tahun lalu, juga dihubungkan dengan JDL. Sementara Menteri Urusan Islam Jordan mengatakan bahawa pembunuhan terhadap Faruqi dilakukan oleh kalangan Zionis.

Tak pasti, siapa yang telah melakukan pembunuhan terhadap keluarga Faruqi. Tapi banyak akhbar di Amerika Serikat, seperti Spotlight, Village Voice, nampaknya cenderung meneka, bahawa pembunuhan itu dilakukan oleh satu jaringan internasional. Village Voice baru ini membuat berita bahawa ada usaha pembunuhan terhadap seorang tokoh intellectual Palestin yang kini mengajar di Amerika serikat. Tapi namanya tak disebutkan. Namun, menurut Fober, anggota FBI, yang dikutip Spotlight, target pembunuhan itu sebenarnya ialah Prof. Edward Said, yang mengajar di Universiti Colombia.

Namun, semua pihak, terutama polis setempat, sepakat, bahawa pembunuhan nampaknya begitu terbiasa dengan situasi rumah Dr. Faruqi. Jika ini benar, maka pembunuhan terhadap diri Dr. Faruqi memang telah direncanakan.

---

(Dipeteika dari Panji Masyarakat No 510 Zulqaidah 1406)

## PUSAT ISLAM BARU DI MADRID

### Madrid: Rabithah Alam Islami

Dalam musim Bunga (Spring) ini akan segera dimulai pelaksanaan satu projek besar bagi pembangunan satu Pusat Islam di Ibunegara Spain, diatas tanah yang dihadiahkan oleh Bandaraya Madrid kepada negara-negara Arab pada tahun 1976 bagi keperluan projek tersebut.

Projek ini akan mengandungi satu masjid besar yang boleh memuat seramai 1500 orang sembahyang, satu Perpustakaan, satu Pusat Kebudayaan dan satu Sekolah Bahasa Arab.

Disebutkan bahwa Plan Pusat Islam itu telahpun dipercayakan kepada Kelompok Engineer Poland, yang telah pun terpilih dari seramai 455 Plan dalam pertandingan antarabangsa, dimana ikut serta kelompok Engineering seramai 44 negara.

Jawatankuasa Pengadil yang tersusun dari Maghribi, Spain, Mesir, Poland dan Jepun telah memilih Plan dari Poland pada 4hb February 1980, dan mensifatkan Plan ini sebagai satu

tradisi Spain-Arab yang Islamik.

Dari sisi lain pula, sumber-sumber yang patut dipercayai di Bandaraya Madrid, menyatakan bahwa Dewan Bandaraya di Ibunegara Spain telahpun mengambil suatu keputusan untuk membagikan satu tapak tanah yang lain kepada Keduataan Maghribi untuk membangun satu masjid diatasnya, dibahagian Utara dari Kota itu, dimana hidup sejumlah besar putra-putri Islam.

(Rai 944)

---

## PUSAT ISLAM OXFORD

### Makkah: Rabithah Alam Islami

Setiausaha Agung Rabithah Alam Islami, Dr Abdullah Omar Naseef, dalam suatu kenyataan yang disampaikan, setelah kembali dari Britain, menyatakan harapannya bahwa Pusat Islam Universiti Oxford di Britain yang beliau sendiri turut serta dalam pembukaannya akhir-akhir ini, akan membuktikan cita-cita yang diharapkan bagi membetulkan imej Islam di Barat.

---

---

Beliau juga mengharapkan agar Pusat Islam ini memberikan saham bagi memberikan kebolehan yang layak kepada para mahasiswa Pengajian Islam, dengan cara Islam, yang lebih utama dan lebih besar, jauh dari sangkaan yang salah dan mengelirukan dan memburukan Islam dengan suatu cara apapun.

Setiausaha Agung tersebut selanjutnya menyatakan bahwa Pusat Islam ini diadakan yang pertama kali dengan bentuk semacam ini di satu Universiti Barat, dan ahli-ahli jawatan kuasanya adalah dari kaum Muslimin dan yang independent. Dan perlu disebutkan bahwa Majlis Pengelola ini dipengerusi oleh Fadlilah Syeikh Abu Hasan An Nadawi, anggota Majlis Taksisi Rabithah Alam Islam dan anggota-

anggota Majlis tersebut terdiri dari: Yang Mulia Amir Syargah Syeikh Sultan Al Qasimi, dan Yang Terutama Dr Abdullah Turki Mudir, Universiti Islami, Imam Muhammad Ibn. Suud di Riyadl, dan Yang Terutama Dr. Naseef, Setiausaha Agung Rabithah Alam Islami.

Dalam akhir kenyataannya, beliau menyatakan sukacita pihak Rabithah Alam Islami diatas selesainya pertemuan dan penanda tanganan penubuhan Pusat Islam tersebut bagi pihak pengasas, semoga dengan pembukaannya agar memberikan kecemerlangan bagi Islam dan kaum muslimin dikawasan tersebut, Insy Allah.

(Rai 944, Safar 7, 1406 H)  
(BHM)

**Sesungguhnya zakat itu adalah untuk orang-orang fakir, miskin amil-amilnya, orang yang dijinakkan hati mereka, untuk kemerdekaan hamba, orang yang berhutang, untuk berjihad kepada jalan Allah dan orang-orang musafir, yang demikian itu adalah ketentuan daripada Allah dan sesungguhnya Allah maha mengetahui dan bijaksana.**

# MUTIARA HIKMAT

## NILAI HIDUP

*Kehidupan manusiawi adalah kehidupan yang mempunyai nilai khas.*

*Nilai hidup manusia itu berdarjat-darjat dan bertingkat-tingkat, sesuai dengan besar kecilnya manafaat hidup itu.*

*Ada yang berpendapat bahwa hidup itu sekedar nafas dan gerak.*

*Ada yang berkata: hidup itu untuk makan atau semata-mata satu perjuangan untuk hidup. (a struggle for life).*

*Ada pula yang berfikir seperti botanist: hidup adalah untuk mengembangkan jenis.*

*Tapi, penilaian penyair-penyair lain pula:*

*"Hidup bukanlah sekedar nafas yang turun naik, tetapi hidup adalah ilmu dan amal."*

*Setengah daripadanya mengunakkan pula:*

*"Bila hidup seseorang*

*dari ilmu dan amal kosong*

*TAKBIRKANLAH dia empat kali*

*kerana sesungguhnya ia telah mati."*

*Penyair yang lain berkata pula:*

*"Hiduplah anda sebagai mujuhid*

*kerana hidup itu adalah 'aqidah dan jihad'.*

*Khairil Anwar pun berkata pula:*

*"Sekali bererti, sudah itu mati."*

*"Nilai hidup yang tinggi terletak pada AMAL, JUANG, JASA dan BAKTI."*

*"Bila berangkat kealam baqa*

*tanpa jasa*

*dan mati*

*tanpa bakti,*

*hidup ini tiada erti."*

*"Kerna itu berilah nilai hidup ini.*

*Hiasi ia dengan jihad dan bakti.*

*Anda akan hidup sepanjang zaman,*

*sebab manusia dapat menikmati*

*jasa yang anda tinggalkan."*


*Abu Asyfairi  
(Suara Masjid)*

# AL-HUDA

## TERBITAN BULANAN

Dapatkan  
senaskah keluaran  
baru

Mengandungi unsur  
keagamaan dan penedidikan  
yang harus dibaca oleh  
Umat Muslimin sekalian.



Terbitan  
Angkatan Nahdhatul  
Islam Bersatu (BINA)  
Jalan Tun Datuk Patinggi  
Haji Abdul Rahman Ya'kub  
Petra Jaya, 93050 Kuching, Sarawak.

# RANGKUMAN DOA

## DO'A SESUDAH AZAN


اللَّهُمَّ رَبَّ هَذِهِ الدَّعْوَةِ التَّامَّةِ وَالصَّلَاةِ الْقَائِمَةِ  
آتِ مُحَمَّدًا الْوَسِيلَةَ وَالْفَضِيلَةَ وَالشَّرْقَ وَالذَّرَجَةَ الْعَالِيَةَ  
الرَّفِيعَةَ. وَابْعَثْهُ مَقَامًا مَحْمُودًا الَّذِي وَعَدْتَهُ

Allaahumma rabba haadzihid da'watit taamati.  
Wasshalaatil qaaimati, aati Muhammadanil wasiilata  
walfadhiilata, wasy syarafa waddarajatal 'aaliyatar  
rafii'ata, wab'atshu maqaamam mahmuudanildzii wa'adtah

### **Ertinya:**

“Ya Allah yang telah memiliki doa yang sempurna serta shalat yang didirikan ini, berikanlah dan keutamaan kepada Nabi Muhammad, juga berikan kehormatan dan derajat yang mulia dan tertinggi pada beliau. Dan berikanlah tempat kedudukan yang terpuji, sebagaimana yang Engkau janjikan,

(Hadis riwayat Bukhari)



**BANGSA TEGAS  
NEGARA TEGUH**



# AL-HUDA MENEMUI ANDA

DAPATKAN SETIAP KELUARAN  
Terbitan Angkatan Nahdhatul  
Islam Bersatu (BINA)



**JANGAN LUPA!**

*Memberi sumbangan, berupa artikel, buah fikiran, kewangan  
bagi membiayar penerbitan yang sekarang masih terbatas*

*Ibadahku, Hidup Matiku kerana Allah.  
Wabillahittautiq wal Hidayah.*